

BOLETÍN SOBRE RESPONSABILIDADE SOCIAL DA Universidade de Vigo

NOVEMBRO 2017

PUBLICACIÓN ELECTRÓNICA MENSUAL ELABORADA POLA UNIDADE DE ANÁLISES E PROGRAMAS

RELENDO A HISTORIA DO FRANQUISMO DESDE UNHA ÓPTICA DE XÉNERO



Rosa Tedín | Ourense

Pola súa participación política, pola súa condición de nai ou muller de “esquerdistas”, por formar parte da rede de axuda aos fuxidos, por reproducir no fogar o modelo ideal do réxime de “nai e esposa”, por formar parte tamén da “orde moral” do franquismo exercendo a prostitución... No golpe militar de 1936, na Guerra Civil e no franquismo, son moitas as fronteiras nas que a muller xogou, dun xeito ou doutro, un papel propio. No libro *Nuevas perspectivas en el estudio de la mujer durante el franquismo*, un grupo de oito historiadores e historiadoras, encabezados polos profesores da Universidade de Vigo Julio Prada e Jesús de Juana, mergúllase

nese período para, a partir de nomes propios e historias concretas, facer un percorrido e visibilizar a historia das mulleres no franquismo. Entre os diferentes aspectos abordados, no estudo da represión sobre as mulleres en Galicia “demóstrase a natureza sistemática e integral da mesma”. [+info](#)

UNHA WEBSERIE NA QUE APRENDER E TRABALLAR POLA INCLUSIÓN SOCIAL



Eduardo Muñiz | Pontevedra

“Lévome unha moi boa experiencia, na que aprendín moito”, recoñece a alumna de Comunicación Audiovisual Araceli Louro do seu labor como produtora de *Generación Wifi*, a webserie escrita e dirixida pola xornalista Julia Castro que, trala súa presentación no Teatro Principal o pasado 18 de outubro, estrease esta semana na rede con tres versións de cada un dos seus capítulos, aos que suman subtítulos, audiodescrición e interpretación en lingua de signos. “Foi unha decisión que tomamos cando comezamos, na televisión si podes dispor destes recursos, pero a web non é un novo mundo ao que o

audiovisual está moi enfocado hoxe en día no que isto é algo que non hai e que críamos necesario”, salienta desta aposta por promover a inclusión desde o audiovisual a produtora dunha curta cuxo equipo técnico estaba integrado principalmente por alumnado desta titulación da Facultade de Ciencias Sociais e da Comunicación.

[+info](#)

A UNIVERSIDADE ACHEGARÁ VOLUNTARIADO E COÑECEMENTOS PARA A RECUPERACIÓN DAS ZONAS QUEIMADAS



M. Del Río | Vigo

Máis de 80 persoas están xa anotadas na campaña de voluntariado para a recuperación das zonas queimadas tras a vaga de incendios de hai 15 días. Esta iniciativa, coordinada pola Vicerreitoría de Extensión Universitaria e Relacións Internacionais e a Escola de Enxeñaría Forestal, busca implicar á comunidade universitaria en futuras actividades encamiñadas á protección, recuperación e seguimento dos terreos queimados. A inscrición está aberta ata o día 10 deste mes e posteriormente artellaranse grupos, medidas e lugares de actuación. Como explica o director da EE Forestal, Juan Picos, "o primeiro que temos que facer é ver con tanta xente

contamos, o seu perfil académico e a súa procedencia para poder comezar a organizarnos e dar resposta ás necesidades dos concellos e comunidades de montes máis afectadas". Esa será a clave desta iniciativa, "traballaremos con calma, planificando ben e tratando de achegar o valor engadido que pode dar a Universidade co seu voluntariado". Ata o momento "xa se puxeron en contacto co Concello de Vigo e co de Salceda de Caselas, así como con varias comunidades de montes da zona de Vigo, así como con asociacións forestais", porque a idea é traballar nas contornas dos tres campus, como explica o vicerreitor de Extensión Universitaria, Manuel Fernández Iglesias. Nas vindeiras semanas continuarase unha ronda de contactos coas administracións locais para poder estender este programa a outros lugares afectados como Carballeda de Avia, Pontearreas, Ponte Caldelas, etc. [+info](#)

REPRESENTANTES DOS ÁMBITOS ACADÉMICO, POLÍTICO E EMPRESARIAL AFONDAN NO PRESENTE E FUTURO DAS ENERXÍAS E O DESENVOLVEMENTO SOSTIBLE



M^a del Carmen Echevarría | Vigo

Tras anos de actividade, a Cátedra Fenosa presentouse hoxe en sociedade cun obradoiro no que representantes dos ámbitos académico, empresarial e político analizaron e debateron sobre enerxía, medio ambiente e desenvolvemento, as tres temáticas arredor das que pivota a cátedra, que dirixen os docentes e investigadores da Universidade de Vigo Xavier Labandeira e Juan Antonio Añel. Ambos os dous directores foron os encargados de presentar ante as e os asistentes ao obradoiro, que se desenvolveu na sede en Vigo da Fundación Barrié, varias investigacións que están a desenvolver sobre o impacto

da meteoroloxía extrema e o cambio climático na xeración de enerxía, así como os últimos resultados de estudos con modelos climáticos sobre modelización de ventos na península ibérica e accións futuras sobre modelización de vento e enerxía eólica. [+info](#)

UN EQUIPO TRANSNACIONAL TRATARÁ DE OPTIMIZAR O USO DE RESIDUOS AGROFORESTAIS NON VALORIZADOS NA ACTUALIDADE



D. Besadío | Vigo

A biomasa máis abundante, a xerada coa limpeza dos montes ou con actividades agrícolas como a poda das videiras ou dos kiwis, é un dos recursos con maior potencial da Eurorrexión, tanto desde o punto de vista enerxético como económico. Non obstante, pese ao seu elevado valor e a súa alta dispoñibilidade –máis de 50.000 hectáreas dedicadas a viñedo, máis de 12.000 toneladas de Kiwi producidas só en Galicia-, todos estes recursos están a día de hoxe sen valorizar. Conscientes desta realidade grupos de investigación de diferentes universidades e centros tecnolóxicos que levan anos

traballando nestas cuestións uniron os seus potenciais no proxecto Biomasa-AP, financiado polo programa Interreg V-A España-Portugal 2014-2020 (Poctep), unha iniciativa liderada polo Centro Tecnolóxico de Eficiencia e Sostenibilidade Enerxética, EnergyLab, e no que participa como socio o Grupo de Tecnoloxías Enerxéticas da Universidade de Vigo, liderado polo catedrático José Luis Míguez Tabarés. [+info](#)

BIOAUGA INICIA UNHA NOVA ANDADURA ORIENTADA AO COÑECEMENTO E Á INNOVACIÓN



Duvi | Vigo

Segundo confirma a Organización Mundial da Saúde, o 80% das enfermidades do mundo están relacionadas co consumo de auga contaminada, que mata máis nenas e nenos que todos os conflitos bélicos, a malaria e o VIH/SIDA xuntos (máis de 1,5 millóns ao ano). Creada en 2013, a rede Bioauga celebraba nas últimas horas no edificio de Ciencias Experimentais do campus vigués unha xuntanza de apertura que marca unha nova etapa na traxectoria da rede, na que participan 11 grupos e máis de 100 investigadores e técnicos de laboratorio das tras universidades galegas. “Nesta nova andadura a rede

segue a liña marcada pola Estratexia de Lisboa, orientada cara ao coñecemento e á innovación, con particular énfase na investigación e no desenvolvemento tecnolóxicos no ámbito da sostenibilidade ambiental e a eficiencia enerxética arredor da auga”, explica Jesús Torres, docente e investigador do Departamento de Física Aplicada da Universidade de Vigo. [+info](#)

FILÓLOGAS DA UNIVERSIDADE COORDINAN A ELABORACIÓN DO CORPUS ANOTADO DA LINGUA DE SIGNOS ESPAÑOLA CORALSE

D. Besadío | Vigo



Unha mostra real da lingua existente, tendo en conta as posibles variacións a nivel xeográfico, xeracional e de xénero, algo que aínda non existe en España. O grupo de investigación Griles da Universidade de Vigo está elaborando o Corpus Anotado da Lingua de Signos Española, un traballo que porá a disposición das e dos investigadores, docentes e usuarios gran cantidade de mostras e exemplos de uso que contribuirán á descrición desta lingua.

“A elaboración dun corpus de referencia e anotado de todo o estado español vainos permitir garantir a descrición e a análise da lingua de maneira exhaustiva, ademais de converterse nun documento indispensable para afrontar accións normalizadoras que sirvan para conformar unha visión global da lingua e da súa comunidade de signantes”, explican as profesoras Ana Fernández Soneira e Inmaculada Baez, investigadoras principais do grupo Griles, un equipo con vinte anos de experiencia en traballos relacionados coa LSE e do que na actualidade forman parte 15 investigadoras e investigadores de todo o estado. [+info](#)

CADA HORA NA BIBLIOTECA CONVÉRTESE NUN EURO PARA ESCOLAS DO CONGO




Duvi | Ourense

Un ano máis o campus de Ourense súmase á celebración da Olimpíada Solidaria de Estudo, unha acción de sensibilización e solidariedade internacional a través da cal as horas de estudo das persoas participantes son transformadas por empresas colaboradoras en diñeiro para proxectos de cooperación ao desenvolvemento. Do 5 de novembro ao 5 de decembro, os usuarios e usuarias da Biblioteca Rosalía de Castro do campus de Ourense están chamados a colaborar nesta iniciativa e contribuír a recadar fondos para un programa de reinserción educativa de menores vítimas da guerra na República Democrática do Congo. [+info](#)

UN CONCURSO ESCOLAR PARA VISIBILIZAR E POTENCIAR O PAPEL DA MULLER NA CIENCIA

11 DE FEBREIRO: Día Internacional da Muller e a Nena na Ciencia
II Concurso escolar de debuxo e redacción do Día Internacional da Muller e a Nena na Ciencia




Duvi | Ourense

O día 11 de febreiro celébrase o Día Internacional da Muller e a Nena na Ciencia. Co obxectivo de aproveitar esta conmemoración para contribuír a visibilizar e potenciar o papel da muller na I+D+i, o pasado ano a Facultade de Ciencias, a Escola de Enxeñaría Aeronáutica e do Espazo e a Escola Superior de Enxeñaría Informática uníronse para pór en marcha un concurso escolar con esta temática. A segunda edición deste certame xa está en marcha e as entidades promotoras animan aos centros e ao alumnado de Primaria e Secundaria da provincia a unirse a esta iniciativa.

[+ info](#)

AS APP PARA PERSOAS CON DISCAPACIDADES COMUNICATIVAS DO PROXECTO ACCEGAL ACUMULAN MÁIS DE 80.000 DESCARGAS




M. Del Río | Vigo

Para as persoas con algún tipo de discapacidade comunicativa os teléfonos intelixentes e as tabletas ofrecen unha nova posibilidade para abrir vías alternativas para interaccionar coa contorna, para expresarse e para evitar a súa exclusión social. O proxecto Accegal, que arrancou en 2011 da man do Grupo de Tecnoloxías da Información (GTI) da Escola de Enxeñaría de Telecomunicación e do Centro de Educación Especial Manuel López Navalón en Santiago de Compostela, traballa para crear aplicacións con esta finalidade. Durante estes seis anos, educadores e

enxeñeiros deseñaron e puxeron a disposición da sociedade nove aplicacións que se basean na comunicación alternativa e aumentativa. Un dos enxeñeiros de Accegal, Jonathan Juncal, avaliou o impacto e a efectividade destas nove aplicacións dentro da súa tese de doutoramento. Entre todas elas acumulan máis de 80.000 descargas a nivel internacional, explica o investigador, o que demostra tanto a súa utilidade como o seu correcto funcionamento. [+ info](#).

UNHA VISIÓN FEMINISTA DA ARTE

OBRADORO
A Arte do Sexo: sexualidade, creación e xénero



Doar 15,11 e 15 de novembro
de 18.30 a 20.45 h
Fundación Laxeiro
C. Pedregal 100, 15. 3. 20018, Vigo
Universidade de Vigo

M. Gradín | Vigo

"A arte pode amosar condutas e aspectos sexuais e, polo tanto, revelar os presupostos ideolóxicos e culturais en que se basean". Esta é a base sobre a que se asenta o curso A arte do sexo: sexualidade, creación e xénero segundo o seu coordinador e profesor de Belas Artes Ignacio Pérez-Jofre. A actividade, organizada pola Unidade de Igualdade, terá lugar na Fundación Laxeiro entre os días 13 e 15 deste mes, e está dirixida tanto a creadores e creadoras como a estudantes e profesorado dos eidos artísticos, especialmente aos da Facultade de Belas Artes de Pontevedra, así como público en xeral interesado na arte ou na igualdade de xénero.

[+ info](#)

SETE RECEITAS PARA UNHA INTERVENCIÓN EDUCATIVA BASEADA NO MOVEMENTO



Eduardo Muñiz | Pontevedra

Programas que fan do teatro unha ferramenta terapéutica a empregar con vítimas da violencia machista e persoas con problemas de deterioro da súa saúde mental, proxectos de intervención que empregan a expresión corporal con mulleres que padeceron un cancro de mama e a ximnasia para mellorar as habilidades sociais na adolescencia, xunto con programas educativos que empregan a actividade física con nenos con necesidades de apoio educativo, a equitación con persoas con autismo e dirixidos a mellorar a hixiene postural de traballadores.

Estes sete exemplos das liñas de investigación e intervención socioeducativa desenvolvidas polas investigadoras e investigadores do grupo GIES-10, da Facultade de Ciencias da Educación e do Deporte, recóllense no libro *Diseño y evaluación de programas educativos en el ámbito social*, un volume coordinado pola profesora Margarita Pino e publicado por Alianza, que pon o acento na metodoloxía empregada e no método de avaliación dun programas sustentados no uso do movemento e da actividade física e no desenvolvemento de procedementos participativos, dirixidos a "promover unha saúde integral, entendida como saúde física, mental e social". [+ info](#)

O ALUMNADO DE FP CONVÉRTESE EN PERSOAL INVESTIGADOR DO CINBIO POR UN DÍA



M^a del Carmen Echevarría | Vigo

Preto de cincuenta estudantes dos ciclos de grao superior de Laboratorio Clínico y Biomédico e de Anatomía Patolóxica y Citodiagnóstico do Centro de Estudos Superiores Aloya de Vigo foron as e os primeiros en visitar este luns o Centro de Investigación Biomédica da Universidade de Vigo, na primeira xornada de portas abertas que, con motivo da Semana da Ciencia, organiza Cinbio. As e os alumnos de Aloya foron recibidos no salón de actos do edificio de Ciencias Experimentais pola directora do centro, África González, que lles explicou os obxectivos e dinámicas de

traballo do Cinbio, a onde o grupo se dirixiu, unha vez rematada a intervención da responsable do centro, para participar en varios obradoiros impartidos por investigadoras e investigadores do centro. [+ info](#)

PROGRAMA 'DEPORTE E MULLER' ARRANCA CON ACTIVIDADES DE SOLO PÉLVICO E IOGA



Rosa Tedín | Ourense

Entre as novidades da programación da Área de Benestar, Saúde e Deporte da Universidade de Vigo está este cuadrimestre a posta en marcha no campus de Ourense dunha iniciativa que, baixo o título *Deporte e Muller*, propón un programa de actividade física e exercicio dedicado exclusivamente a este colectivo. Cada semana, as mulleres interesadas poden unirse ás sesións que se desenvolven na Ludoteca e nas que nas que na actualidade se realizan actividades de solo pélvico e

ioga, estando previsto a ampliación da programación a defensa persoal. [+ info](#)

PARA COMBATER A DESIGUALDADE, PRIMEIRO HAI QUE DETECTALA



Eduardo Muñiz | Pontevedra

“Os estereotipos de xénero inflúen en todas as facetas da vida, vanse transmitindo a través das familias, dos medios de comunicación, da propia escola... e moitas veces non es consciente de que estás asumindo un papel que non che corresponde bioloxicamente”, salienta a investigadora da Facultade de Ciencias da Educación e do Deporte María Lorenzo, unha das docentes do curso de formación en igualdade que, ao abeiro dun convenio asinado entre a Universidade de Vigo e a Deputación de Pontevedra, forma nestas semanas no campus a alumnado e profesorado na

detección e o combate do sexismo e a desigualdade de xénero nas aulas. Dirixido polas profesoras María Álvarez Lires e Azucena Arias, o curso que celebra as súas sesións presenciais na Escola de Enxeñaría Forestal desenvolve nestas semanas o seu primeiro módulo centrado, como explica Lires, “en ofrecer un marco xeral para a detección do sexismo”. [+ info](#)

70 VOLUNTARIAS E VOLUNTARIOS RECOLLEN MÁIS DE 200 QUILOS DE LIXO EN PRAIAS DA RÍA DE VIGO



Mª del Carmen Echevarría | Vigo

De Ribadeo a Baiona, pasando por Muxía, O Grove e Porto de Son, decenas de persoas participaron a pasada fin de semana na xornada de limpeza simultánea de praias organizada por Adega, o Centro de Investigación Mariña da Universidade de Vigo e Campus do Mar e que se saldou coa recollida de máis de 1000 quilos de desperdicios, dos que máis de 200 corresponden aos tres areais da ría de Vigo nos que se desenvolveu a iniciativa. "No caso da ría de Vigo o número de voluntarios foi de 19 na Praia da Ladeira en Baiona, 22 en Arnedo e a Xunqueira en Moaña

e 30 Panxón, en Nigrán. En cada concello houbo entre dous e tres coordinadores, formados en nunha xornadas previas, e outras dúas ou tres persoas en representación de cada un dos concellos", explica Alba Hernández, técnica do Centro de Investigación Mariña. [+ info](#)

UN NOVO VÍDEO DE DIVULGARE EXPLICA COMO A DIVERSIDADE DE MAMÍFEROS INFLÚE NO CICLO DE CARBONO NA AMAZONÍA



Duvi | Vigo

A comunidade científica xa sabía que a diversidade vexetal inflúe nas reservas de carbono e axuda a mitigar os efectos do cambio climático. O que apenas se tiña estudado é se existe un impacto similar producido pola diversidade animal. Por iso, un equipo multidisciplinar de científicos de varios países, liderados pola Universidade de Stanford, puxo en marcha un proxecto na Amazonía no que contaron co coñecemento ancestral de indíxenas das tribos Makushi, Wapishana e Wai-Wai de

Güiana. Ao longo de tres anos realizaron un censo da vida nunha rexión de cinco millóns de hectáreas, identificando máis de 218.000 mamíferos, 46.000 árbores, 43.000 interaccións entre especies e un millón de restos orgánicos. As conclusións amosan que a diversidade de mamíferos inflúe no ciclo de carbono mediante interaccións tróficas nesta zona. [+ info](#)

PARA REMATAR, UNHA REFLEXIÓN SOBRE A TOMA DE DECISIÓNS IMPORTANTES SOBRE SEXUALIDADE POR PARTE DAS ADOLESCENTES


Rosa Tedín | Ourense



Desde o pasado 4 de outubro e de xeito aproximadamente semanal, a novena edición do ciclo *Pensar o Cine* suscitou entre o alumnado da Facultade de Dereito asistente ás súas sesións a reflexión e o debate arredor de temas de actualidade relacionados coa sexualidade, a muller e a igualdade. Este mércores a actividade clausurouse abordando a cuestión da toma de decisións transcendentais sobre a súa sexualidade no caso das adolescentes, tratando aspectos como o aborto ou a maternidade. Amparo Moreno, profesora titular da

Universidade Autónoma de Madrid, foi a encargada de ofrecer a conferencia de peche sobre esta temática. [+ info](#)

CREOU UNHA MULLER AS CANTIGAS DO PERGAMIÑO VINDEL?



Ma del Carmen Echevarría | Vigo

A investigadora e docente da Universidade de Poitiers (Francia), onde dirixe o Centro de Estudos Latino-Americanos, Ria Lemaire, e a catedrática xubilada de Literatura Portuguesa da Universidad Estadual de Campinas (Brasil) Yara Frateschi Vieira, comparten paixón pola literatura medieval, á que dedicaron a meirande parte dunha traxectoria profesional, que as acredita como dúas das maiores expertas internacionais na materia. Lemaire e Vieira compartirán os seus coñecementos cas e cos asistentes ao Simposio Internacional 'E irei madr'a Vigo', que se celebrará os vindeiros 23 e 24 de novembro en Vigo, organizado polo

Departamento de Filoloxía Galega, con motivo da estadia na cidade do manuscrito que contén as cantigas de amigo de Martin Codax. [+ info](#)

ALUMNADO DO PROGRAMA DE MAIORES COÑECE A BASE DO 061 EN PIÑOR



Duvi | Ourense

Unha das características do Programa Universitario de Maiores no campus de Ourense é que ofrece ao seu alumnado a oportunidade de realizar diferentes actividades fóra do eido universitario que teñen como obxectivo que coñezan *in situ* institucións, servizos, empresas e espazos de diverso tipo. No marco desta aproximación á contorna, este xoves un grupo de estudantes sénior do campus achegouse á base de Urgencias Sanitarias de Galicia-061 no Hospital de Piñor. Os participantes, explica Michel Ecuriaza en representación do grupo, "puido coñecer como funciona a rede de servizos de emerxencias médicas en Galicia e

as características da prestación asistencial que ofrecen tanto o helicóptero medicalizado do 061 como as unidades móbiles". Foi, apunta Ecuriaza, "unha visita moi amena e interesante", na que non só puideron coñecer por dentro estes vehículos senón tamén escoitar as explicacións dos pilotos e persoal sanitario presente. Dado o interese que sempre esperta esta actividade, este é xa o terceiro curso en que alumnado do Programa Universitario de Maiores do campus de Ourense se achega a coñecer este servizo. [+ info](#)

DECEMBRO VOLVERÁ UNIR DEPORTE E SOLIDARIEDADE NO CAMPUS



Duvi | Pontevedra

Deporte e solidariedade camiñarán da man, un ano máis, nos eventos que a Área de Benestar, Saúde e Deporte da Universidade prepara para as datas previas ao Nadal no campus pontevedrés. Os días 14 e 17 de decembro, o Pavillón Universitario será escenario dun maratón de zumba e dunha competición de crossfit solidarias, dirixidas a que tanto a comunidade universitaria como a cidadanía poidan achegar o seu gran de area ao labor social que desenvolven diferentes organizacións. No caso do xa clásico Maratón de Zumba Solidario, o obxectivo é

reunir alimentos para contribuír ao labor do comedor dos Pais Franciscanos, mentres que o terceiro Crossfit Solidario combinará a doazón da cota de inscrición que aboarán os participantes a unha ONG coa recollida de alimentos, roupa e xoguetes, que serán doados ao Banco de Alimentos e Cáritas. [+ info](#)

UNIVERSIDADE E DEPUTACIÓN DE PONTEVEDRA IMPULSAN UNHA ESTACIÓN EXPERIMENTAL PIONEIRA PARA O ESTUDO DA AVESPA VELUTINA



Eduardo Muñiz | Pontevedra

O campus de Vigo contará cunha estación experimental, pioneira en Europa, para o estudo da *Vespa velutina*, unha iniciativa pioneira que xorde do convenio de colaboración que a institución académica asinaba este xoves coa Deputación de Pontevedra, que destinará 60.000 euros a unha investigación coordinada polas profesoras do Departamento de Ecoloxía e Bioloxía Animal Josefina Garrido e María Calviño. [+ info](#)

O CERTAME ESTATAL ARQUÍMEDES PREMIA DOUS TRABALLOS DA UNIVERSIDADE SOBRE PENSÍONS E DISCRIMINACIÓN POR EMBARAZO



Rosa Tedín | Vigo

Cada ano, o Ministerio de Educación, Cultura e Deporte convoca o Certame Arquímedes co obxectivo de fomentar o espírito investigador no alumnado universitario mediante a concesión de premios aos mellores traballos de investigación. Entre os galardoados na edición 2017 do concurso están dous traballos fin de grao realizados na Universidade de Vigo. Na Área de Ciencias Sociais e Humanidades, Lidia Cruces, alumna da Facultade de Ciencias

Económicas e Empresariais do campus de Vigo, acadou un segundo premio polo seu estudo sobre a sustentabilidade do sistema de pensións, e Victoria Gil, alumna da Facultade de Dereito do campus de Ourense, conseguiu na mesma categoría un accésit pola súa investigación sobre a discriminación no traballo por embarazo ou maternidade. [+ info](#)

O CAMPUS DA AUGA, PRESENTE NO WATER AND DEVELOPMENT CONGRESS AND EXHIBITION 2017




Duvi | Ourense

O proxecto de especialización do campus de Ourense como Campus da Auga estivo presente esta semana no Water and Development Congress and Exhibition 2017 (Sustainable Solutions for Emerging Economies), organizado por The International Water Association (IWA) na cidade arxentina de Bos Aires. "Transcorridos agora tres anos dende que no 2014 se comezase a traballar de forma sistemática nesta especialización, o Campus da Auga acadou a madurez suficiente como para ser presentado con solvencia e con posibilidades de achegar cousas a foros tan importantes

como os organizados pola IWA, da que nos fixemos socios recentemente", destaca Virxilio Rodríguez, vicerreitor do campus de Ourense e comisionado do Campus da Auga. [+ info](#)

UNHAS XORNADAS PARA AVANZAR NA IGUALDADE NA INDUSTRIA DO VIDEOXOGO



Duvi | Ourense

“A industria do videoxogo segue lonxe dos estándares de igualdade que debería manter”. Tendo en conta esta premisa e a importancia dos videoxogos no ocio e na formación na sociedade actual e co obxectivo de contribuír a mudar o papel da muller neste sector, as docentes María Isabel Doval, da Facultade de Ciencias da Educación, e Alma Rodríguez, da Escola Superior de Enxeñaría Informática, organizan os días 28 e 29 de novembro as xornadas *Videogamificación e sexualidades: identidades, xéneros e discursos interactivos. Consecuencias para a industria e a educación*. [+ info](#)

A BIENAL DE CERVEIRA REÚNE NA SALA X AS OBRAS DE 24 ARTISTAS DE OITO PAÍSES




Eduardo Muñiz | Pontevedra

A piques de cumprir 40 anos de historia, a Bienal Internacional de Arte de Cerveira reuniu o pasado verán na localidade lusa de Vila Nova de Cerveira máis de 600 obras de preto de 500 artistas de 35 países, distribuídas por 14 espazos polos que pasaron preto de 100.000 persoas. Con estas cifras como bagaxe e co propósito de defender a creación artística como “un medio de comunicación intercultural”, a Fundación Bienal de Arte de Cerveira achega á Sala X unha escolma das obras presentes na súa décimo novena edición, nunha exposición que poderá visitarse ata o

17 de decembro neste espazo da Facultade de Belas Artes, que reúne as creacións de 24 artistas de oito países, principalmente de fala hispana e lusófonos. [+ info](#)

A CÁTEDRA JOSÉ SARAMAGO ACHÉGASE A PONTEVEDRA PARA UNIR LITERATURA, COMUNICACIÓN, ARTE E POLÍTICA



Eduardo Muñiz | Pontevedra

“A obra de Saramago caracterízase por unha íntima relación entre música, arte, literatura e un importante pulso sociopolítico”, salienta o profesor da Facultade de Filoloxía e Tradución e director da Cátedra Internacional José Saramago da Universidade, Burghard Baltrusch. De aí que comunicación, arte e política sexan tres dos aspectos a abordar na segunda edición das xornadas internacionais que esta cátedra dedica ao Nobel portugués e que, neste 2017, se achegan ata Pontevedra. Once conferencias e comunicacións, a exposición de traballos de animación e videoxogos feitos polo alumnado da Universidade inspirándose na obra do escritor luso e unha representación teatral integran o programa do evento que se desenvolverá os días 4 e 5 de decembro na Casa das Campás. [+ info](#)

ECOBAS E CAMPUS DO MAR POÑEN EN MARCHA UN CICLO DE SEMINARIOS CIENTÍFICOS RELACIONADOS COA PESCA



D. Besadío | Vigo

Intercambiar coñecementos entre persoas que estudan e traballan desde diferentes ámbitos o mundo da pesca e aprender desta interacción. Este é o obxectivo co que esta semana arrancou na Facultade de Ciencias Económicas e Empresarias un ciclo de seminarios científicos centrados no sector pesqueiro e o ámbito mariño, unha iniciativa que nace como un proxecto conxunto da agrupación estratéxica Ecobas (Economics and Business Administration for Society) e Campus do Mar. [+ info](#)

OS V PREMIOS DE INVESTIGACIÓN DISTINGUEN ESTUDOS SOBRE O CÁLCULO DO PREZO DA VIVENDA E O CAPITAL INTELECTUAL EN GRANDES HOTEIS



Rosa Tedín | Ourense

No marco do Foro Economía e Sociedade, a Facultade de Ciencias Empresariais e Turismo do campus de Ourense e o Colexio de Economistas de Ourense entregaron este martes os seus V Premios de Investigación, destinados a distinguir os mellores traballos fin de grao presentados por alumnado do centro. No Grao en Administración e Dirección de Empresas o premiado foi Iván Míguez, por un estudo sobre os factores determinantes do prezo da vivenda na cidade de Ourense. No Grao en Turismo, a galardoada foi Andrea García, por unha análise da xestión do capital intelectual nos grandes hoteis galegos. Ademais, entregáronse tres accésits sobre temas como a influencia dos xefes de servizo no rendemento hospitalario, a valoración da marca Q de Calidade e o Programa de Clemencia. [+ info](#)

SALGANDO SARDIÑAS PARA VISIBILIZAR AS ACHEGAS DA MULLER Á SUSTENTABILIDADE



Eduardo Muñiz | Pontevedra

Pór en valor as achegas das mulleres ao mundo da ciencia e as vinculacións entre xénero e desenvolvemento sustentable constitúen dous dos eixos do traballo do grupo de investigación de Didáctica das Ciencias Experimentais que, dentro do grupo CIES, coordina a profesora da Facultade de Ciencias da Educación e do Deporte María Álvarez Lires. Co propósito de recuperar nas aulas o con frecuencia invisibilizado "saber das mulleres" e facer del unha ferramenta para o ensino das ciencias, o grupo

desenvolveu nas aulas do grao en Educación Primaria unha experiencia educativa dirixida a achegar ao alumnado ao proceso de osmose que se produce durante a salga, da que veñen de facer balance nun vídeo que formará parte da exposición *Sustentabilidade en feminino*, que se inaugurará neste centro o vindeiro xoves 30 de novembro, no marco das cuartas xornadas *Bo uso e mal uso do mar*. [+ info](#)

O GABINETE PSICOPEDAGÓXICO INICIA UNHA NOVA ETAPA ABRÍNDOSE A PDI E PAS



Eva M. Porto | Vigo

Consello, apoio, prevención, atención...son algúns dos piares sobre os que se sustenta a filosofía do Gabinete Psicopedagógico de Vigo e Pontevedra. Despois de seis anos dirixindo este servizo en Ourense, a psicopedagoga Isabel Ferreiro desembarca nos campus olívico e pontevedrés cos obxectivos moi claros e con intencións de renovación. Deste xeito, a especialista deseñou un programa de actuación no que inclúe novidades como o *coaching* e a realización de obradoiros presenciais, nos que se fomentará a intelixencia emocional no conxunto da comunidade universitaria. [+ info](#)

A EE INDUSTRIAL AVALÍA A SAÚDE DA SÚA COMUNIDADE UNIVERSITARIA

«Duvi | Vigo



Alimentación, peso, hábitos sexuais, saúde física...Estes son algúns dos parámetros que a comunidade universitaria da Escola de Enxeñería Industrial puido avaliar hoxe grazas á presenza neste centro do posto itinerante dos Martes Saudables. Esta iniciativa, que naceu no campus de Ourense, trata de analizar a saúde do alumnado e do persoal docente e de administración para poder así fomentar cambios que incidan na mellora das súas condicións físicas e de saúde. [+ info](#)

ARRANCA O PROXECTO PARA CREAR O MAIOR E MÁIS DIVERSO BANCO DE RECURSOS BIOLÓXICOS MARIÑOS



D. Besadío | Vigo

Pór en marcha o Centro Europeo de Recursos Biolóxicos Mariños, o maior e máis diverso biobanco mariño do mundo. Este é o grande obxectivo co que este martes arrancou en Vigo a reunión de lanzamento do proxecto European Marine Biological Resource Centre Biobank, EBB, financiado polo Programa Interreg Área Atlántica con 1,5 millóns de euros, aos que se suman outros 500.000 achegados polos propios socios, e liderado polo Centro de Investigación Mariña da Universidade de Vigo e o Campus do Mar. Por diante quedan tres anos no que se desenvolverán novas tecnoloxías e protocolos comúns para o mantemento ex-situ, é dicir, fóra dos seus ambientes naturais, de recursos biolóxicos mariños, e se harmonizarán os xa existentes para que os diferentes biobancos traballen de maneira coordinada baixo o selo de Centro Europeo de Recursos Biolóxicos Mariños. [+ info](#)

CIENCIAS ÚNESE Á CONMEMORACIÓN DO DÍA DA SEGURIDADE ALIMENTARIA



Seguridade Alimentaria 2017. [+ info](#)

Rosa Tedín | Ourense

Este ano, a Asociación Española de Licenciados, Doutores e Graduados en Ciencia e Tecnoloxía dos Alimentos puxo en marcha a celebración o 17 de novembro do Día Nacional da Seguridade Alimentaria co obxectivo de que a cidadanía "dispoña e entenda de forma coloquial e amena información sobre procesos alimentarios, normas, recomendacións ou aspectos científicos de aplicación cotiá neste eido". Uníndose a esta conmemoración, a Facultade de Ciencias do campus de Ourense acolleu este mércores a *Xornada*

A UNIVERSIDADE DE VIGO ACADA A TAXA DE OCUPACIÓN MÁIS ALTA DO SUG, CO 99,7% DAS PRAZAS CUBERTAS



Duvi | Xeral

Cun 99,7% de prazas cubertas, a Universidade Vigo acada neste curso académico 2017-2018 a taxa de ocupación máis alta do sistema universitario galego. En total, matricularonse neste curso na institución viguesa 3698 alumnos e alumnas de novo ingreso que, sumados ao resto do estudantado dos diferentes niveis, acada a cifra total de 20.873 estudantes. En concreto, 17.031 cursan estudos de grao, 2033 de mestrado e 1161 de doutoramento. A estes hai que sumar as 62 persoas que aínda están cursando os Estudos Superiores de Deseño Téxtil e Moda de Galiza, titulación

agora convertida nun mestrado, e os preto de 600 alumnos e alumnas matriculados no Programa de Maiores nos tres campus. [+ info](#)

ESPERTANDO A CURIOSIDADE CIENTÍFICA ENTRE OS FUTUROS UNIVERSITARIOS



centro. [+ info](#)

Rosa Tedín | Ourense

Co gallo da celebración estes días en Ourense da feira Galiciencia, estase a achegar á cidade alumnado preuniversitario de diferentes puntos da xeografía galega interesado na divulgación científica. Aproveitando a súa visita a Ourense, un grupo de 40 estudantes de primeiro curso de Bacharelato e cuarto curso de Educación Secundaria Obrigatoria do IES Leliadoura, de Ribeira, visitou este mércores a Escola de Enxeñaría Aeronáutica e do Espazo do campus e participou de talleres demostrativos levados a cabo por investigadores e investigadoras do

ACHÉGASE O NADAL, COMEZA A CAMPAÑA DE RECOLLIDA DE ALIMENTOS E XOGUETES



Rosa Tedín | Ourense

O Nadal achégase e un ano máis por estas datas comeza no campus de Ourense a recollida solidaria de alimentos non perecedoiros, libros e xoguetes destinados ás familias sen recursos. Ata o día 15 de decembro, os membros da comunidade universitaria poden deixar as súas doazóns nos espazos habilitados á entrada de cada edificio. Os alimentos recollidos serán entregados ao Banco de Alimentos e os libros e xoguetes a Cruz Vermella e á Asociación Xuvenil

Amencer. [+ info](#)

ERNESTO PEDROSA CHAMA A ESTREITAR LAZOS ENTRE SOCIEDADE E A UNIVERSIDADE DA QUE É 'AMIGO DISTINGUIDO'



Eduardo Muñiz | Pontevedra

Como un acicate para seguir traballando polo "éxito da Universidade e por achegala á sociedade" recibiu este mércores Ernesto Pedrosa, presidente do Consello Social da Universidade de Vigo, a medalla de Amigo Distinguido 2016, que, nun acto celebrado no Casino de Pontevedra, lle outorgaba a Asociación de Amigos e Antigos Alumnos Alumni. O seu labor a prol da institución académica e a súa "decidida colaboración" coa actividade deste colectivo foron destacados polo seu presidente, José María Franco, nun acto que contou

coas intervencións do vicepresidente da Xunta, Alfonso Rueda; do vicerreitor do campus, Juan Manuel Corbacho; e do presidente do Consello Social da Universidad de Oviedo, Ladislao Azcona, no que Alumni recoñeceu tamén o labor dos seus vicepresidentes dos campus de Vigo e Ourense, José Luis Vazquez e Francisco Novoa. [+ info](#)

30 EXEMPLOS DE ESFORZO E SUPERACIÓN SERÁN RECOÑECIDOS NA GALA DO DEPORTE



Eduardo Muñiz | Pontevedra

Unha noite de celebración, na que "poñer en valor os logros dos nosos deportistas e tamén abrírnos á sociedade, recoñecendo a aquelas persoas, entidades e asociacións que ao longo do ano tiveron unha traxectoria destacable tanto no ámbito deportivo como na difusión dos seus valores". Este é obxectivo central, como sinala Gustavo Loureiro, responsable da Área de Benestar, Saúde e Deporte da Universidade no campus, da Gala do Deporte da Universidade de Vigo,

que o vindeiro martes 28 celebrará no Teatro Principal de Pontevedra a súa edición número 26 e na que serán recoñecidos os logros deportivos e a traxectoria dun total de 30 persoas e colectivos. [+ info](#)

UN CHAMAMENTO POLA INCLUSIÓN REAL NA SOCIEDADE DOS CIDADÁNS CON ENFERMIDADE MENTAL



Rosa Tedín | Ourense

O lema escollido para celebrar este venres no campus de Ourense a I Xornada Galega sobre Traballo Social e Saúde Mental foi *Relegados á condición de infra-cidadáns: novos desafíos en saúde mental*. Con este título, a organización quixo xa reflectir o enfoque e o obxectivo dunha cita posta en marcha para ser un foro no que profesionais do eido social e sanitario implicados na atención de persoas con enfermidades mentais e

das súas familias puidesen analizar e discutir as dificultades que atopan no seu día a día. [+ info](#)

UNHA TESE REIVINDICA O PAPEL DA RSC COMO FONTE DE VANTAXE COMPETITIVA PARA AS EMPRESAS



D. Besadío | Vigo

Reivindicar a responsabilidade social corporativa como unha fonte de vantaxe competitiva para a organización, capaz de manter e reforzar a súa posición fronte ás demais empresas presentes no mercado e apoiar a súa sustentabilidade a longo prazo. Esta é, a xuízo da investigadora Luz Amparo Macías, a gran contribución da súa tese de doutoramento, un estudo pormenorizado centrado no tecido empresarial colombiano, onde son escasos os estudos que abordan as implicacións deste tipo de comportamentos, e cuxos resultados son aplicables a outros

contextos culturais e económicos de economías emerxentes, como son os países do centro e sur de América. [+ info](#)

ONCE EXEMPLOS DE CONSERVACIÓN AMBIENTAL DEBATÉRONSE NO CAMPUS



Duvi | Pontevedra

“Presentar e visibilizar diversas iniciativas de conservación e ou problemáticas ambientais”, vinculadas tanto a Galicia como a outras parte do mundo, constituía, segundo sinala a Sociedade Galega de Historia Natural (SGHN), o obxectivo central da I Xornada Galega de Patrimonio Natural de Biodiversidade, que esta sociedade promoveu o pasado sábado, coa colaboración da Escola de Enxeñaría Forestal, neste centro do campus. Un total de once conferencias integraban o [programa](#) dunha xornada

de debate que foi inaugurada polo director da escola, Juan Picos, e o delegado da SGHN en Pontevedra, Xosé Lois Rey, e que abriu un relatorio sobre os lumes forestais na comunidade galega do presidente da SGHN, Serafín González. [+ info](#)

DE COMO O PATRIARCADO TAMÉN SAE A ESCENA NOS VIDEOXOGOS



Rosa Tedín | Ourense

Nunha sociedade patriarcal, a fenda e os estereotipos de xénero saen a escena dun xeito máis ou menos evidente e intenso en todo tipo de eidos. Con esta premisa, co obxectivo de visibilizar como “a industria do videoxogo segue lonxe dos estándares de igualdade que debería manter” e co desexo de contribuír a mudar esta situación, o campus de Ourense acolle este martes e mércores as xornadas *Videogamificación e sexualidades: identidades, xéneros e discursos interactivos. Consecuencias para a industria e a educación.* [+ info](#)

O PROXECTO GEOATLANTIC PRESENTÁSE NO CAMPUS CO OBXECTIVO DE FOMENTAR A ENERXÍA XEOTÉRMICA



Duvi | Ourense

O campus de Ourense acolleu este mércores a xornada de presentación de Geoatlantic, un proxecto de cooperación territorial do Espazo Atlántico liderado polo Concello de Ourense que busca promover o uso da enerxía xeotérmica nas comunidades por medio do desenvolvemento conxunto de ferramentas e metodoloxías que permitan a posta en marcha de ecosistemas locais. Membros da comunidade universitaria puideron coñecer tanto as oportunidades que abre esta iniciativa como afondar en temas relacionados co cambio do modelo

enerxético actual. [+ info](#)

41 DEPORTISTAS DA UNIVERSIDADE DE VIGO, NOS XXXI XOGOS GALAICO DURIENSES




Duvi | Ourense

41 deportistas da Universidade de Vigo participaron este mércores e xoves nos XXXI Xogos Galaico Durienses, que nesta edición se celebraron no campus de Elviña, na Universidade da Coruña. Un ano máis a cita volveu a reunir a deportistas e técnicos das tres universidades galegas e do norte de Portugal, concretamente de Minho, Trás-os-Montes e Alto Douro e Porto, para convivir, competir e intercambiar experiencias. [+ info](#)

GLOBOS VIOLETAS ÁLZANSE NO CAMPUS CONTRA A VIOLENCIA MACHISTA

Duvi | Pontevedra



Alumnado, profesorado e persoal de administración e servizos do campus pontevedrés congregouse este mediodía ás portas da Facultade de Ciencias da Educación e do Deporte para amosar a súa repulsa e rexeitamento á violencia contra as mulleres, nun acto que pecharon alzando no aire unha morea de globos violetas, a cor do feminismo. Dirixido a dar voz ao estudiantado no rexeitamento a esta lacra social, esta mobilización partiu da iniciativa dun grupo de estudantes de Ciencias Sociais e da Comunicación, que no marco dunha

materia do grao en Publicidade e Relacións Públicas tiñan que abordar a mobilización social. [+ info](#)

UNHA EXPOSICIÓN PON ROSTRO ÁS MULLERES INVISIBLES QUE SUSTENTAN O MAR

Eduardo Muñiz | Pontevedra



“A xente non sabe das redeiras, pensa que os peixes saltan sos ao barco pola borda”. Esta frase da redeira Sefa Abal serviu á profesora da Facultade de Ciencias da Educación e do Deporte María Álvarez Lires como exemplo dos obxectivos da exposición *Sustentabilidade en feminino: achegas das mulleres á sustentabilidade do mar*, que desde este xoves pode visitarse na Facultade de Ciencias da Educación e do Deporte. Unha escolma de 40 fotografías, que abranguen desde 1917 ata a actualidade e que poñen rostro a esas “mulleres anónimas” que

traballaron e traballan en diferentes sectores vinculados co mar, conforman, xunto coa posta en funcionamento dunha [web](#) con diferentes recursos, un proxecto presentado no marco da IV Xornada sobre o Bo Uso e o Mal Uso do Mar. [+ info](#)